



partii naleraq

10.okt 2019

UKA2019/36

Arferit angisuut nunatsinnut pisassiissutaasartut tamakkerneqarneq ajornerat pillugu aammalu tamakkerlugit pisarineqannginnerannut aporfiusartut qanoq iliuseqarnikkut piiarneqarsinnaanersut pillugu Naalakkersuisut nalunaarusioqqullugit peqquneqarnissaannik Inatsisartut aalajangiiffigisassaattut siunnersuut. Nalunaarusiaq kingusinnerpaamik UKA2020imi saqqummiunneqartussanngorlugu.

(Inatsisartuni ilaasortaq, Nikkulaat Jeremiassen, Siumut)

Arferit angisuut nunatsinnut pisassiissutaasartut tamakkerneqarneq ajornerat pillugu inatsisartunut ilaasortaq Nikkulaat Jeremiassen Siumut siunnersuutaa pillugu saqqummiussaqaassaagut.

Nunatsinni neqissaqarniarnikkut sapinngisamik tamakkiisumik atorluaanissarput aporfeqannginnerusumik aqqutissiuttaariaqartoq assortugassanngilaq.

Ukiuni kingullerni tikaagulliit aammalu arferit anginerit pisassiissutaasartut ajoraluartumik tamakkerneqarneq ajorput pingaartumik arferit angisuut eqqarsaatigalugit.

Ukiaq manna qujanartuik pisassaat tikaagulliit eqqarsaatigalugit qoroortuumik piniarneqartussanngorlugit tamanut ammaanqarneqerat assut malunnartumik iluaqutaasoq oqaatigissavarput tassanilu Naalakkersuisut aamma qutsaavissaapput siusinaartumik aaqqiinerat pillugu.

Ukuli arferit anginerit qanoq tamakkiinnerusumik iluaqutigineqarsinnaanerat eqqarsaatigisariaqarput, assersuutigalugu arfeq Qipoqqaq nunatsinni ingasattumik malunnartumillu amerlavallaalersut ajoraluartumik atunngilarput. Innuttaasut qipoqqaq sungiusimajunnaarsimagaat malunnarpoq tikaagullimullu sanilliullugu tuniniartarnerat piumaneqarneralu killeqartartoq oqaatigineqartarpoq.

Inuiaqatigiit ataatsimut isigalugit arferit angisuut qanoq atorneqarsinnaanerat eqqarsaatissaavoq tamakkiisumik iluaqutigineqassappata. Arferimmi angisoorsuit pisarineqartartut eqqarsaatigalugit aamma pilanniartarneri assut ilungersunartinneqartartoq takussarparput. Tassa pilannissamut tinnitarneq ulittarnerlu apeqqutaasaqaaq taamaattullu arferit angisuunik pilanniarnermi ajoraluartumik neqerujussuaq annaaneqartarpoq pingaartumik sila aasaanerani eqqarsaatigalugu.

Pilattarfiit qanoq ittut sumilu pilersinneqassappat tamakkua ilanngullugit nalilersugassaapput neqit asiusartut annikkinnerulissappata.

Taamatut oqaaseqarluta siunnersuut ataatsimiititaliami suliarineqarnissaa innersuupparput.

